

11хутбе

Аллаһу Те‘аля Мухаммед Пейгъамбернинъ уммети ичун Къур‘ан-и Керимде шойле буюрды :

Манасы: «Умметлер арасында догърулыкъны эмир эткен ве яманлыкътан сакъындыргъан энъ хайырлы умметсинъиз».

Пейгъамбер Эфендимиз шойле буюрды: «Сизден ким яманлыкъны коръсе, оны догъурласын, догъурламагъа кучю етмесе, тилинен догъурласын, тилинен догъурлап оламаса, юрегинен инкяр этсин. Бу – шойле вазиетте инсаннынъ этеджеги энъ аз шейдир.

Мухтерем мусульманлар!

Динимиз бизни яхшылыкъны эмир этмемизни ве яманлыкътан сакъындырмамызны чагъыра, догъру олгъангъа – догърудыр, янълыш олгъангъа – янълышыр айтмамызны эмир эте. Бильгенинъиз киби, Ахыр заманда яшаймыз. Пейгъамбер Эфендимиз, илимсиз фетва бергенлернинъ чогааладжагъыны бильдирген эди. Бунынъ ичюн, бизим бойнумызгъа тюшкен иш – янълыш фетва берген ве янълыш диний бильгилерни даркъаткъан инсанлардан сакъындырмакътыр. Бу – бизим ичюн фарздыр. Пейгъамбер Эфендимиз немлеген богъдайны саткъан кишиден сакъындырып деди: «Ким бизлерни алдатса, бизлерден дегильдир».

Сайгъылы мусульманлар! Иште, Пейгъамбер Эфендимиз бу алдаткъан инсангъа къаршы сусмайып, хакъсызлыкътан сакъындыргъан олса, биз де. Яни диний меселе олсун, я да дюнья меселеси олсун, хакъсызлыкъкъа сусмамакъ керекмиз.

Мисаль, дин ичюн, шимдики вакъытта даркъалгъан базы группа инсанлар айталар ки: «Олюлерге Къур‘ан окъумакъ олмаз». Не ичюн экен, Пейгъамбер Эфендимиз, «Адем огълу ольген сонъ онынъ япкъан амеллери кесилир», деп, айткъаны ичюн.

Сайгъылы мусульманлар! Бу Хадисни догъру анъламакъ керекмиз. Хадиснинъ манасы шойле: «Намаз, ораза, хаджылыкъ ве оларгъа ошагъан амеллер кесилир, яни инсан ольген сонъ, онъа айтылмайджакъ: намаз къыл, ораза тут, хаджылыкъны яп». Эгер олюге Къур‘ан окъумакънынъ файдасы олмаса эди, не ичюн Пейгъамбер Эфендимиз дженазе намазыны къылдыргъанда Фатиха суресини окъуды? Фатиха суреси Къур‘андан дегильми?

Бундан анълашыла ки, бу группа инсанларнынъ фикирлери догъру дегильдир.

Бу группа инсанлар Къур‘андан шу аетни кетирелер: «Къур‘ан, тири олгъанларны сакъындырмакъ ичюн эндирильди». Ве олар айталар ки: «Къур‘ан тири олгъан инсанларгъа онен Шариатны япмакъ ичюн эндирильди, олюлерге окъумакъ ичюн дегиль».

Сайгъылы мусульманлар! Бу аетте айтылдымы: олюлерге Къур‘ан окъуманъыз, деп? Ёкъ, айтылмады. Демек, бу инсанларнынъ – ваһхабистлернинъ фикирлери янълыштыр. Олар бу сёзни къайдан чыкъардылар? Аллаһу Те‘аля Къур‘анны му‘минлерге рахмет оларакъ эндирди:

*

Манасы: «Му‘минлерге, ичинде шифа ве рахмет олгъан Къур‘анны эндирдик».

Му‘минлер базылары олю, базылары тиридир. Аллаһ буюрмады ки, «Тек тири мусульманларгъа рахметтир». Демек, Къур‘ан тири ве ольген мусульманлар ичюн рахеттир. Ве ваһхабистлернинъ: «Къур‘ан – тек инсанларны сакъындырмакъ ичюн, олюлерге окъумакъ ичюн дегиль» – айткъанлары бундан эвель окъулгъан аетке къаршы келир.

Аллаһ мусульманларны янълыш диний акъымлардан къорчаласын!